

Kipindji kya 9 : Kakongye – Kipatulwilo kakyo pooso pakadi

Nabinobino ; tubapatuula kakongye bu ; kintu kimune « ***mwanda anwe booso, nwi umune mu Kilisto Yesu*** » bena Ngalateya 3 :28. Eyendo muyile kipaso akimono Fumu booso bena kukumiina. Anka mu bipwa bibakidi paku kamishibwa kwa fumu mu mawulu, muntu baadi musasakate bwa kutuula aye ndumbulwilo na ta mulonde ndabukisho ya mu Kilombeeno Kipyaa. Kyakya kikitshino kibalwishishe buwumune bubaadi butule Fumu ku kibangilo mukatshi a mwilo waye. Tutentekyesheyi'shi kepatshilo ketu ka kulamata ku byabya abyakula bifundwe na kukita byabya abikyebibwa.

Ku kibangilo, kakongye kabaadi ku yelushaleme atumono'shi batumibwe babaadi kwanka na bangi bena kukumiina, babaafikile bukidi bu bakunkushi mu kakongye. Byabya tabikite mafuku ebungi nya, mwanda bangi bantu bebungi ku yelushaleme babakumiinyine p'efuku dya mpatekote. Babafikile mu mawumbo elekeene a nsenga ishima aawukibwa kalolo. A kinyi kibebafikilanga pababalukanga mu mawumbo abo ? na dimonyi atumono kunyima kwa mafuku apela kubamwenekyelwe kubingwabingwa kukata ku yelushaleme na bena kukumiina booso mu Kilisto « ***babapalakeswe mu mawumbo a ku Yundeya na mu Samadiya*** » Mikitshino 8 :1. Bibafikile'shi bisaka bya bena kukumiina bibashalele mu mambalo ebungi elekeene. Tala mu Mikitshino 9 :10, 10 : 23, bu kishikamisho. Na mukandu wibuwa wubapalakeene lubilo-lubilo, na tukongye twibungi tubafimine.

Mpyele baadi umune a ku batumibwe baadi atembela twatwa tukongye. Tala mu Mikitshino 9, na abimweneka'shi baadi mutambukye bikata. Bwa kutembela tukongye. Kumbangilo ; bena kukumiina babaadi na bukalabwino sunga kyukiilo babaadi abasanganibwa ku yelushaleme, anka patufiki mu kipindji 13 mu mukanda wa Mikisthino, atumono kakongye ka ku Antyoshe takabaadi na kineemo kikata kukila ka ku Yelushaleme ; pakutala mifubo ibaadi ayikitshika mu kaka kakongye. Misuusa ibungi Mpyele na Mpolo babaadi abende ku Yelushaleme bwa [kupudisha] kulumbuula ingi myanda ibaadi ayimweneka kumbangilo kwa mufubo wabo. Mpolo baadi ende dingi ku Yelushaleme bwa kutwadila balanda bukwashi.

Bibafikile'shi mukandu wibuwa ubapalakeene, na tungi tukongye tubafimine. Tubaadi tooso bina mbidi ya « ***Mbidi imune*** » na tubaadi atufubu pooso patudi, na kufuba bu [baleshi-mpala] a Kipwilo kyoso kishima. Tubaadi buwumune, mwanda babaadi na Fumu umune na babaadi bakunkushibwe na Kikudi-E-Selele.

Muloo ukata ubaadi awumweka mu eyendo mu bifundwe, twipatshilo tukata twa kakongye na bu kamoni bipwandjikile kwikala bipatulwe bino : kulesha kifulo kya Kilisto, nwikitshishe bwa kulama buwumune bwa Kikudi mu kwanyibwa kwa kufukama (Bena Efeso 4 :3) twatwa twipatshilo atukankamika mu kukula mu Kikudi kwi bena Kakongye na bukamoni bwa Kakongye kumpala kwa bashi bakumine bwa'shi bekale na lukulupilo mwi Fumu bwashi bapashibwe.

Ingi myanda yaku ino mifubo ifundwe kalolo mu kipindji kya 6. Kwi bingi bipaso bya kutamisha bu kamoni mu buwumune na mu katama, bu bya tumono kifwatulo, saa itungi tukongye twi peepi na tungi, bi muloo kwi twatwa tukongye pa twibungu pamune bwa

kulangwila, na kukankamika suunga kulonga pamune bifundwe. Apafiki ungi mufubi, mwanda wibuwa bwa kwibunga pamune pa mwanda wa kwikala bakankamikibwe naye. (Talayi bina Mwanda 4 bya kumpala mu Kipindji kya 6).

Kwi ungi mweneno pabitale Kakongye pooso pakadi na mashito ako ; pa mwanda wa bukalanga. Kilombeeno Kipya akitulesha abitenkye Fumu kwi Kakongye, bwakadya kukita kwi oso mwina mbidi a Kakongye, atuwuku booso kalolo'shi bibofule kwilamuuna n'eyendo adilongyeshibwa mu kilombeeno kipya, anka pamwanda wa bukalanga abikitshika pa mwanda wa kufuisha kulumbala, kuludika na kukudisha. Tabikumbeene kwikala na kepatshilo ka kulwisha sunga kwiwobwela.

Tutaluleeyi kalolo ino mweneno ilekeene.

Bukalanga bulombeene kwata ingi mweneno elekeene. Mukile kubofula, ngyawa a mweneka ungi mukwetu mululame ena mwisambo wa kufukama na muntu a mu Kakongye bwa ku mukankamika pa mwanda wa kushintuula muwa waye. Bwikwikala dingi bu kudimusha pa bitale myanda ya bena nsenga na bipanka, na bikumbeene kumulamuuna kwi Fumu. Ingi nshalelo ikumbeene kulwisha bwina kukumiina bwa muntu na bikumbeene kuludika. Bi bukangi kepatshilo k'Eyi dy'Efile-Mukulu, (2 Timote 3 :16).

Kulombeene dingi kufika bilema bikata bilombeene kutalulwa na kwibisamba, su tambyakulwe, abifiki bu elonda mu Kakongye na kufwisha kwitshibula na kulwisha dingi bu kamoni. Ino myanda ilombeene kwakulwa muyile bifundwe. Bibakitshi bibuwa, bifundwe abitulesha mwatudya kuyila kalolo, byabya abibanga kwi muntu pabupenka. Mateo 18 etukwasha mu uno mwanda.

1. « ***Na su mukwenu akulwishiisha, nda akamuleshe kilubilo kyaye mu bubidi bwenu, su bakupushisha, bopaasha mukwenu*** » Mateo 18 :15 nyi kipaso kibofule na akifwisha kufukama mu kuludika mwanda ooso na kushi kwikutwena. Anka misuusa yooso yawa ena mwanda na mukwabo, tendanga na mpaka « ***kubupenka na bupenka*** » kutala Fumu alesha kino kipaso bu kya kulonda na kyakukita kumpala a byoso.
2. « ***Anka su tamukupushiishe, ata muntu umune suunga babidi, kukyeba'shi mukanwa mwa tumoni tubidi suunga tusatu eyi dyoso dishinkamishiibwe*** » Mateo 18 :16 mbilombeene kwikala tumoni, tulombane bwakulesha etata ku mwanda ooso ufundjibwe. Atumono mu kino kishingatshilo kineemo kya tomoni. Kamoni akapetekyelwa ku misambo bwa kupusha aye nabeene mayi na kwifundena na mandamuna abatusha, mulombeene kutusha kabingilo mu byabya byadi mupushe na mu ingi myanda ayilondo. Atukwata bukome bwa kaka kabingilo, sunga'shi bwa ingi myanda ilekeene, mu 3 Yoano : 14, Yoano apafundu'shi : « ***Anka nakulupila ku kumona binobino na atukesamba*** ».

3. « *Na su tamwibapushiishe, ebilangule Kakongye ; na su apele’ni kupushiisha Kakongye, omumone bu mwina mawumbo na bu mufutshishi a bitadi* » Mateo 18 :17, su mwanda ngulombeene kutambulwa ku Kakongye byabya akasambisha mpese yooso ibidi. Yawa apele kitshibilo kya Kakongye numumone bu muntu shiina lukalo lwa kulesha kulamata kwaye kwi Fumu na numwate anka byabya mu Kakongye ; kepatshila nkafudilo mu bino byoso bwa kalama myanda ilondeene milongo na buwumune mu Kakongye bwa kupela’shi tala kafutakani kamweneka.

Twina kipatulwilo kya bukalanga mu mukanda wa 1 Bena Kolente kipindji kya 5. Kubaadi kumwnekye mwanda ubaadi [awukyebe] awutungu kitshibilo kya Kakongye, bu bibaadi bakulu babaadi balengule wawa mwanda, mutumibwe baadi mukalakaswe bikata pa buno bukamoni bwa Kakongye , baadi akyebe’shi balumbule uno mwanda kalolo na mu kipaso kya kutusha nkumo ya kinemo.

Kwibunga kwa Kakongye akukyebe kwikale « *na matalwa a Fumu Yesu Kilisto, twi bebungye pamune na bukome bwa Fumw’etu Yesu Kilisto, bwa kulubula, mwishina dya Fumwetu Yesu Kilisto, yawa mukile wawa mwanda* » 1 Bena Kolente 5 :4.

Tatufubu muyile matalwa etu nya, suunga’shi muyile byetu binangu, anka mu byabya abileshe bifundwe na muyile bu kamoni bwa tumoni mu mwanda ukitshibwe. Kwi bikitshino bishabileshe bu kamoni bululame kumpala a Fumu na abifikisha kusabuula eshina dyaye.

Eshina dya Fumu di bu bulami bwetu. Abitungu tumone mu mukanda wa 1 Bena Kolente 5 :11 « *Anka binobino nenufundjila’shi tanwikalanga kipwano na muntu ayitanyinibwa bu mwanikye su mwikale sha lukiyebanokyebano, suunga sha busumwa, suunga mulangwidi a makishi, suunga nkayishani a mulomo, suunga nkodi a malofu, suunga sha manyengani, muntu ebyabya tanudyanga suunga naaye nya* ». Kikitshino kwi yawa muntu ebyabya kino : « ... **Kashayi munkatshi mwenu’nwe banabeene yawa mubi** » 1 Bena Kolente 5 :13 abitungu saa yooso kutetenkyesha kitungo kya kushushula mwanda ; bu abileshe mukanda wa Mateo kipindji kya 18, su tabyabya mwanda awukamweneka bu ushii wululame. Kyakya kikitshino takikatusha muntu mu kwikala kwaye kwa bu kina mbidi kya ku mbidi ya Kilisto nya ; mwanda kino kimeno kitulwe pa kipandjilo, kishii bya kushimina. Kipaso kya kwikala. Akimweneka muyile bikitshino byobe abisabulusha Fumu na dingi kibu kepatshilo pa mwanda wa kutshiba na kutuula muntu pashaa muyile bu kamoni.

Kwi ungi mwanda wina kepatshilo kakata ; bukalanga bwibuwa, anka bwikale na kinangu kya kyalusha muntu mukatshi à Kakongye. Fumu akyebe kumona kakongye kende kumpala na muloo na’shi kina mbidi kyoso kikale ky’eyendo ku mbidi umune na kikale na mbalo mu Kakongye. Mukanda wa 2 Bena Kolente 2 :6-8 akitulesha na kutuula kishikamisho mu uno mwanda. Muntu baadi mukumbibwe baadi mu kyongua kikata na baadi na lukalo lwa’shi Kakongye ka mufwile lusa na kamwalushe. Mutumibwe, alesha’shi bino bilulame na’shi bakwetu balume na bakashi balombeene kulesha kifulo kyabo kwadi pa kumufwila lusa

« **mu bu muntu bwa Kilisto** » suunga « **Mukutala kwa Kilisto** ». Kushi bino abikamwene kashi « **satana akekala na makasa** » na abikala dingi bubi.

Tupusheyi dingi kalolo, nani baadi mwate kitshibilo kyafundilo. Anka abitulesha mukanda wa 1 Bena Kolente 5 ; abimweneka patoopa'shi bi ku matalwa na ku bushito bwa Kakongye. Mpolo tabaadi mwibikite nya, suunga baadi awuku bwa kutalula wawa mwanda. Nabo banabeene babaadi abalondo mwanda, kutemesha tumoni nakukanya kyongwa kya mukwetu emu mwanda. Kangi kakongye takena matalwa a kwata angi mapangadika suunga kutwelakana mu wawa mwanda, anka su yawa mukwetu sha mwanda enda nao kwi kangi Kakongye ; byabya bakwetu ba kaka Kakongye balombeene kutaluula wawa mwanda, suunga'shi abayipusha Kakongye kabaadi katushe bukalanga (kamwimikie). Mutumibwe Mpolo tabaadi mudimushe twatwa tukongye pa uno mwanda suunga kwibalesha bwa'shi bataluule wawa mwanda.

Kino kipindji kilombeene kwikala kitambulwe kalolo, mwanda atumono misuusa ibungi bangi bena kukumiina ba mu ingi miilo na mu angi mawumbo, abakula bwa'shi kangi Kakongye, suunga'shi takatwele mu myanda ya kangi tukongye, kalombeene kwakula pabitale kitshibilo suunga kilema kimwenekye mu kukiila mu bifundwe bu byatwikalanga bamone mu milongo iku nundu. Twibekale bakankamikibwe ku uno mwanda ku bifundwe abileshe'shi : « ***Yawa oso [enu] lubisha na shabombeela mu lulambukiisho lwa Kilisto tena Efile-Mukulu nya...*** » 2 Yoano 9 mu kishingatshilo 10 atenteka bino : « ***Su muntu afiki kwanudi na tatwala luno lulambukiisho tanumutambulangayi ku mashibo enu na tanumwelanga mooyo*** » mu kino kibangilo nyi mulombeene kwatshibwa kitshibilo kyoso. Mu mukanda waye wa kasatu, mutumibwe ena mwanda na **Dyotelefe**. Afundu bino'shi : « ***Ngi pa wawa mwanda, su nafiki, nakatentekyesha mikitshino yakitshi kubanga ku mayi a bukyelo kwatudi ; na, tamwimeene paapa, aye nabeene tatambulaa bakwetu mu lukumiino na akutshishwa baba abakyebe [kwibatambula] na ebabingi mpaa na mu kakongye*** ».

Kitshibilo kyatshibwe kumpala a booso, na mayi a kwakula kushi peenda ku mikanda. Ku byabya nyi kipaso kya kutwesa kufukama, kutamisha, buwumune na myabi mukatshi a Kakongye. Bilombeene kwakulwa, patuteluula saa ya myanda mu « **mbidi umune** » na kwata kwa kitshibilo kwi kakongye pa bu penka. Apatshibwa kitshibilo muyile bifundwe, akinemekibwa t'anka penda mu kaka Kakongye nya, anka ku « **mbidi imune** » yooso ishima. Fumu, bu mutwe wa kakongye, atala buwumune bwa mwilo waye mu nsenga na bya tukimbi kutuula mu bikitshino by'eyendo bya mu kilombeene kipya ; atwikitshisha mu dyadya eyondo : « **Mwadiye, anwe namu, nwibeebakibwe kumune, mwanda wa kwikala kishaleelo ki'Efile-Mukulu mu kikudi** » Bena Efeso 2 : 22.

Patwele binangu, musuusa wa kabidi mu mukanda wa 2 Yoano, atumono ingi myanda pala-pala, tabibofule mu ano mafuku eleelo kutosha na kutopeka ku bino abitekye'shi kakongye kooso kekale kapasukye. Lwalulo lwa mu bifundwe alusakisha atwilusangana bu keleshesho mu mukanda wa Looma 1 :16 atumono Fwebe baadi ende nyendo ya kukatuka ku Sankele na kwenda ku Looma, kipaso kini kyababaadi abamutambula kwi be ku Looma ? Mutumbwe

afundu'shi : « byabya nenulubwila Fwebe nkashanetu, a mu kakongye ka Sankela, numutambule mu fumu bu bipwandjikile na bena selele na'shi numukwashe mu mwanda oso wadya ku kekala nenu bukamoni awushinkamisha,tanka penda mukumutambula kwa kalolo n'anka mu bu wumune bwa booso na ku kankamika dingi buwumune bwa bena selele bemu ma mbalo abidi elekeene. Binobino, kino kilele akikitshika munkatshi atukongye, mu kufundjila mukwetu mukanda wa bu kamoni kwi kangi kakongye mu kepatshila ka bu wumune misuusa yooso na pa mwanda wa kukumbana ku meesa. kukankamika kwibuwa munkatshi atukongye. Na dingi bwa baaba be mu nyendo, pa mwanda wakupeta bukwashi bwa tukongye. Uno mukanda tangulombeene kwatshibwa bu « certificat » a buwumune [suunga bu mukanda wa kupwa kwa tulasa], kino kilele takilombeene kutungunuka kwanka kwi muntu mwina kukumiina mukibwe nya, ingi saa mbilombane penda kutuma lwimuno na ku kankamika bakwetu.

KUFUNDA MUNTU : Ungi mwanda ubatentekwa, atupusha saa yooso kwifundena na bilumbu abituku kwi bantu suunga mu bisaka bya bantu saa ayimweneka mwanda wa ungi mwina kukumiina mu kakongye. Pangi abikitshika pakupasha myununo suunga ku bilema, suunga'shi ku mikanda. Byabya namu abikankamika kakongye su? Kuno kwifundena [akulwisha] na kusabulusha kakongye na bi bubi kwi baaba abebikitshi. Pabikitshika mu kipaso kya kufunda mukanda abimweneka bu myanda ikata na mbikumbeene byafwisha bukalanga kwi baba bewufunde. Bino bikupilwa suunga myanda ikumbeene kwikala ikatushwe kwi booso abeyipusha na abeyibadika, nakupela byabya byoso bikitshikwe bwa kutwena na mukwetu mulume suunga mukashi. Bikumbeene kutunisha baaba booso abatusha myanda ya kufundana, anka su abikitshika muyile ndambukisho ya mu bifundwe bya tupete mu mukanda wa Mateo 18 byatwikalanga bamone kumpala. Nakyo kipaso kimune kilombeene kutaluula na kya kulonda myanda. Apetulesha Fumu nabeene kipaso akikyebe kukita, atwe abakyebe ku mulonda abitungu dingi tukite anka mu kyakya kipaso. Kulonda abyakula bifundwe, nakyo kipaso kimune kya kukita bwa buwa bwa kakongye. Tutaleyi mu mukanda wa bena Efeso 4 :31-32 « **Kaashaayi munkatshi mwenu, buulo booso, na sungu yoso yibukopo, na bukyelo booso, n'ewunga dyoso, na mulomo oso, na kifita kyoso ; anka yikalaayi baasha kalolo kwi bantu na bantu, nukyengye na abakyengye nwilekyeshene bubi bantu na bantu bu bii Efile-Mukulu namu mwinulekyeele mu Kilisto ».**

Bena Fidipi 2 :14-16 « *Nukite bintu byoso kushii myununo, na kushii kwitshintu, byanushaa ku topekiibwa na nwikale beselelee, bana b'Efile-Mukulu bashiina kutopekiibwa, munkatshi mwa kino kipuungo kibi na kipengame, mwanumunika Etaata bu Elampi pa senga, nutwale eyi dya muwa, bwa ntumbo yande p'efuku dya Kilisto [Bukamoni] shi ntshimusuukye lubilo bisumanga suunga'shi ntshimufube bisumanga ».*

Kino kipindji kya kano kakanda kya : 9 Kyaluulwe mu Kisongye mu Kabinda, mweshi wa Kasamombo mu kipwa kya 2025 kwi bakwetu bano : **Arthur NYINDU ASSANI**, na **Esther KIMANKINDA YANGONGO**.